

COMUNICÂT STAMPE

COMUNS: DI VUÊ TOPONOMASTICHE FURLANE UFICIÂL CUN CHÊ TALIANE

Zanon: passaç impuartant pe promoziun dal status e pe difusion de lenghe

Udin, ai 5 di Avrîl - Lis denominazions toponimichis uficiâls in lenghe furlane di Comuns, fraziuns e localitâts dal Friûl Vignesie Julie a àn di vuê la aprovazion de Zonte regionâl.

Cu la delibare fate buine dal Guvier regionâl i toponims par furlan a deventin co-uficiâi e duncje ents locâi e lôr ents strumentâi che si cjatin dentri dal teritori di insediament dal grup linguistic furlan, delimitât de leç regionâl 15/1996, a saran tignûts di ca indevant a doprâ dongje de denominazion in lenghe taliane ancje la denominazion in lenghe furlane.

"Al è pardabon un gnûf passaç impuartant, che al met in vore ce che e proviôt la leç regionâl 29/2007 pe tutele, valorizazion e promoziun de lenghe furlane tal cjamp de toponomastiche. Di cumò indevant la pari dignitât uficiâl des denominazions di comuns e localitâts in lenghe furlane e vierzarà ae pussibilitât di rivâ a une largje presince dal furlan te segnaletiche stradâl, tal materiâl uficiâl dai ents locâi e vie indevant", al comente il president de ARLeF-Agenzie regionâl pe lenghe furlane, Lorenzo Zanon, ricuardant che la leç e proviôt ancje che la Regjon e sedi autorizade a stipulâ convenziuns cun altris aministrazions publichis e cun sogjets privâts par promovî l'ûs des denominazions uficiâls in lenghe furlane.

La elencazion e cjape dentri sedi lis denominazions in lenghe furlane comune, sedi chês in varietât furlane locâl. Di fat, lis denominazions a son stadis proponudis ae Regjon de ARLeF, tignût cont des variantis locâls e dai parês esprimûts dai Comuns interessâts. In particolâr, a son stadis

individuadis daûr dai principis e criteris stabilîts dal Comitât tecnic sientific de Agenzie.

La schirie di toponims e je a disposizion sul sît ARLeF (www.arlef.it) te sezion "Risorsis", sot de vôs "Toponomastiche".

Elisabetta Pozzetto

Regjon Autonome Friûl Vignesie Julie
ARLeF – Agenzie Regjonâl pe Lenghe Furlane
Place ai XX di Setembar 23
33100 Udin
0039 0432 555724 fax 0432 204158 mob 0039 335 8002058